



## QVÆSTIO MEDICA

QVODLIBETARIIS DISPUTATIONIBVS

MANE DISCVTIENDA

IN SCHOLIS MEDICORVM

Die Iovis 15. Novembris.

M. CLAVDIO GVERIN,

DOCTORE MEDICO PRÆSIDE.

*An vitæ longioris ex junioribus parentibus orti?*

I.

**S**EXVS non extra marem & fœminam. Mas in alio, fœmina in se generat. Vtrumque genitalium structura, situs, temperiesque discriminat. Mari Natura concessit, quò fœminam iniret, penem prominulum, insigni ductu pervium, cui duo testes appensi subsunt. Fœminæ uterum elargita est, membranosum, rugosum, cavum, peni excipiendo, atque ex apposita materia prognerandæ soboli accommodatum. Ea materia, semen tam virile quàm fœmineum, & menstruus sanguis. Idcirco mari fervidam impertita est temperiem, quâ luculentum semen prodiret, fœminæ frigidulam, quâ sanguis superflueret cum semine. Tum utrique insevit stimulos amoris, quibus exciti venereo complexu jungerentur, liberosque susciperent, ad speciei propagationem. Adeò fœmina quæ his æquè confert ac vir, ni flore formæ digna audit quæ monstretur, monstrum non est. Fœlices, qui vitam aliis dando, sibi dant. Qui spe vitæ cœlebs vivit, misère fallitur: Quis furor, ne moriari mori? Ut semen partes spermaticas delineat, sic coagmentat sanguis carnosas, qui illis confor-

matis affluit. Vtroque gnati fiunt, ut paternorum bonorum, sic malorum hæredes. Vtrumque quò parentes habent calidius, humidius, purius, eò dant prolem longiore lucis usurâ fruituram.

## I I.

**V**IVENTIBVS omnibus humidum pingue inest, in quo cum calore & spiritu, vita radices agit. Id in solidis partibus inhærescit, quæ ex semine ortæ processere. Humidum illud à calore continuò diripitur; impendio minùs reficitur; hinc in dies arescit, eoque consumpto calor extinguitur, cujus extinctio mors, dolore vacua si naturalis. Frustrâ quis Peliam recoquere tentat. Omnes una manet nox, & calcanda semel lethi via. Attamen ut homo inter animantia cætera, sic inter homines, qui calidior, humidior, tardius experitur fatum ineluctabile. Temperatus ad omnes excessus flexibilis, plurium morborum injuriis patet, & ad interitum ruit ocyùs. Sicco, cui perspicacius ingenium, citissime perit flos juvenilis, abiturque vita. Quantum ardente Sirio squalent corpora, ob siccitatem: Quàm vere concinnè florent, ob utilis humoris affluentiam; non item hyeme pluviosâ. Ut humido aëreo gaudet calor, sic aqueo marcescit. Ipse vitæ opifex, dum humidum vastat, quo tenetur, prima fit interitus causâ; altera est excrementorum accessio, quam effugerit nemo.

## I I I.

**N**ON incassum Natura sexum distinxit in marem & foeminam, quos interdum vix discernas. In maribus quandoque intrò conditus penis prolapsione temporis se dat in conspectum: Foeminas in mares conversas credit imperitum vulgus. In mulieribus, suppressis menstruis, aliquando tam fruticosus pilus genas obvelat, ut viros ementiantur. In maribus quibus ut foeminis mammae protuberant, interdum unâ cum sanguine superflua pars chyli ad eas fertur, & abit in lac alibile. Ad generationem utrumque sexum concurrere, ac semen emittere necesse. Sine virili semine, nequidem potest informem molam foemina concipere; aliàs quid eâ frequentius. Muliebre semen virilis familiare alimentum. Mas & foemina juniores, ut corpus, sic semen calidius, humidius, puriusque habent. Eorum sub amore merentium compositio, quâ junctis osculis ludunt, properantque simul ad metam, maximè conducit ad prolem. Bestiæ, quia bestiæ, utero gerentes marem respuunt; mulier admittit; ejus uterus similis navi, quæ plena meliùs tollit vectorem; hinc ferè sola superfætat. Dum illætabili

coitione gravidari se refert, non opus viro glandem suaveolenti perungere oleo, quò ipsam delectet impensius; ludificatur auscultantem. Vt ex masculino semine prædominante mas, ex foeminino foemina, sic ex utroque æquabili vi concurrente hermaphroditus emergit, nusquam potens utriusque sexus adimplere vices, virilis seminis, aut menstrui defectu. Si utrumque semen partitè coëat ac concrecat, gemelli sobolescent, vix atate processuri, si dispari sexu. Natos parentibus aut aliis similes facit muliebris imaginatio. Si mulieri naturæ sacra facienti ante oculos obversetur imago speciosa, assimilem ipsi prolem enitetur: Si nupta cum adultero rem habens de marito cogitet, prolem edet quæ marito assidebit; sic quispiam ejus quem parentem agnoscit spirans effigies, adventitia sæpè propago.

## I V.

**V**ITA calore & humore stat. In utroque insignis mutatio ætas. Ea multiplex, infantia, pueritia, pubertas, adolescentia, juvenus, & senectus triplex, cruda seu viridis, quieta, & decrepita, quam qui attingit, *πύμπελος* scilicerniusve audit. Vt calore & humore luculentè, sic atate homo mutatur. Quò ortui propior, plus utriusque participat. Maternis umbraculis egressus, sequaci circumfluit humore, quo sensim augetur & adolescit; mox in dies arescit. Adulto, pleniori alimento fruens corpus semen profert, quo simile generet. Illud calidissimum, humidissimum, purissimumque est: juvenescenti calidum magis, minùs humidum, nec adeò purum: senescenti defervens, siccum, impurissimum. Eadem materia generationis, quæ nutritionis: Decedentis substantiæ instauratio, nutritio est: Partes spermaticæ semine, sanguine carnosæ, ut generantur, sic aluntur. Residuum alimenti partium spermaticarum semen, carnosarum sanguis: Residuum illud partibus à quibus defluit assimilè: Quò partes spermaticæ & carnosæ calidiores, humidiores, puriores, eò calidius, humidius, purius semen, eò calidior, humidior, purior menstruus sanguis: Quibus partibus juvenes calidi, humidi, senescentes evadimus frigidi, sicci: Iisdem qui insidet calor, continuâ actione, magis ac magis fatiscens, ut minùs coquit ac digerit, sic patitur peregrinum humorem copiosius affluere.

## V.

**V**IRI & foeminæ congressus à mutuo amore principium fit. Vt amentur, maximum philtrum est, sint amabiles. His

se se amantibus, ad maleficium arcendum, non necesse viro pronubum annulum permingere. Frustrà de gente Fescenninorum quidam, tribus nodis, ternos neet colores, dicetque, Veneris vincula neeto; aut lupi virgam alterutrius nomine ligabit; aut acum quæ syndonem ad sepeliendum mortuum confuerit, geniali toro defiget. Concordi amore ligatis animis, facilis & fructuaria copula corporum est. Quò amor juvenes acriùs incessit, atque exagitat, eò semen emittunt copiosius quàm senescentes, in quibus otio non acuitur. Mari, cui juveni penis gnaviter exporgit se, arrectisque astat cristis, ac subsilienti manat semine, senescenti marcet, vix nuptiale subit antrum, parum abest quin ad pomœrium lentum deponat onus. Mulieri, cui in juventæ flore, uterus suavissimum rorem amoris haurit avidissimè, annosæ petulco licet pene concussus vix patescit, atque illum effœtè forbillat. Hinc junioribus effervet semen, senescentibus defervet. Sanguis menstruus semper in utero cunctatione vitium capit; ectymatum author, ingravescente ætate tam nocens, ut ejus maligno miasmate, vetulæ quædam tenellulis infantibus marcorem inferant exitialem. In junioribus calidum, humidum, copiosum, purum semen, cum innocentiori sanguine, à quibus vita longior.

*Ergo vitæ longioris ex junioribus parentibus ori.*

## DOMINI DOCTORES DISPUTAVRI.

M. Ludovicus Morin.  
M. Petrus Lombard.  
M. Philippus Marbon.

M. Raymundus Finot.  
M. Robertus Raoul.  
M. Mattheus Thuillier.

M. Bertinus Diexhoeye.  
M. Stephanus Bachot.  
M. Ioan. Bapt. Moreau, Professor Regius.

Proponebat Lutetiæ IOANNES BAPTISTA DE  
MONSTROEIL, Parisinus, A. R. S. H. M. DC. LXVIII.

## PARISIIS,

Ex Typographiâ F. MUGUET, Regis ac Illustr. Archiepiscopi  
Parisiensis Typographi, viâ Cytharæ, ad Insigne  
Adorationis trium Regum.